

in Aste che saranno lanze 100. Per l'altra lettera di 4 avosto: il re haverli ditto a Ginevra esser zonto sguizari 2000, sichè saranno 4400 in campo et ne pol haver aumero 10 milia, e poi l'orator parlò col cardinal Roam qual li disse esser lettere di oratori dil roy apresso il re de' romani: come quel re li havea ditto voler partir in Italia insieme col roy da boni fradelli e a questo modo faria l'acordo con sguizari come vorano, zoè lasserà tuor Milan al roy et il stado di la Signoria sia lassato tuor a lui, *aliter* si faria prima turchi che lassar tuor Milan al roy, et che l' ditto cardinal li disse: el roy vol andar da la raina; et l'orator nostro exortò al tornar presto, lassava de li el cardinal, el gran canzelier e lo so consejo. *Item*, scrive esso orator non poteva mandar lettere de qui come el voria, perchè misier Zuam Jacomo ha scritto non ha modo di mandar lettere de qui se non con gran spexa, perhò non scriva se non è importantia. Per l'altra di 5 avosto: come il re havia spazà lettere al papa e diversi principi di Germania danando el signor Lodovico che havia fato venir turchi contra la Signoria. *Item*, eri ricevete lettere di la Signoria per Placidio, di 19, qual le lexe al cardinal per esser partito el roy *licet* fosseno replicate. Fono le prime per le qual intese a Milan esser prexon uno corier et il roy ha scritto al papa vogli scomunicar el signor Lodovico perchè niun non li darà favor maxime per haver incià il Turchi; *etiam* scrisse a li electori di l'imperio. *Item*, quella matina il roy partite con tre cavali, il resto li va drio per stafeta, resta il cardinal con potestà regia. *Item*, per Placidio intese il Triulzi haver preso Spim loco verso il zenoeze, era ben 700 homini dentro, di li qual ne amazò 100, il resto fato presoni e ruinato le mura. *Item*, per via dil ducha di Lorena ha inteso di sguizari, in la rota deteno al re, esser morti 300 zentihomeni alemani et 7 conti. *Item*, a di 3 monsignor di Ligny parti da Liom per andar in Aste, et monsignor di Biau fratello dil cardinal di Roam *etiam*, con 300 cavali, è venuto di quà da' monti. *Item*, era li uno messo dil marchexe di Mantoa qual vol star li, come el dice, fino el suo signor habi risposta da la Signoria nostra. *Item*, Placidio ritorna, qual ha ditto al roy dil zorno e come si habi a romper, et ehe la Signoria ha tutto in ordine *solum* li manca saper questo, etc.

Vene domino Jacomo da Nola secretario dil conte di Pitiano con uno altro secretario *noviter* venuto chiamato Francesco...; et expose il conte voleva da la Signoria ducati 2000 over li sia mantenuto la condotta *juxta* la promessa; fo mandato fuori per

consultar et poi li fo risposto si scriveria a li provedadori il voler nostro.

Da poi disnar fo pregadi. Vene il principe, e poi leto lettere.

Fu posto parte per li consejeri: che ogni zorno di la settimana futura sia chiamato el pregadi e tutti vegni soto pena di 10 ducati, a requisition di sier Hironimo Capello stato provedador per le camere, et have 27 di no e fo presa: vol menar sier Francesco Corner fo camerlengo a Padoa.

Item, fo posto, per li savii dil consejo e di terra ferma, dir a l'orator ispano è qui, ritorna in Spagna, zereha le cosse dil Turchi, et danar il signor Lodovico, et donarli 20 braza di veludo negro. Have 9 di no, il resto di la parte e fu presa.

Item, fo posto, per li savii preditti e nui savii ai ordeni, di scriver al provedador di Cataro toglì Zupa a la Montagna negra con quei pati li par; have una non sincera, 3 di no, 172 di la parte. Et è da saper fo mio aricordo che niun si ricordava di questo.

Item, fo posto per l'horo savii la parte di le grazie di le vendede di le caxe, cossa molto crudel et longa; contradixè sier Gasparo Malipiero era provedador sora i officii; li rispose sier Filippo Trum procurator savio dil consejo, sier Polo Pixani el cavalier l'avogador volse andar in renga; et fo terminato differir, etc.

Item, fo posto per li ditti far 2000 provisionati di castelli e teritorii nostri, exeptuando il Friul e trivisan e sia fata la mostra per li capitani e vice colaterali, con ducati 3 al mexe, zoè uno ducato pagi la Signoria e do l'horo, e siano mandati in campo, et non hessendo boni homeni quei dil comun pagino un bon. Et cussi poi in execution fo fate le lettere et compartito per li teritorii zoè Padoa e li castelli provisionati 500, visentin e li castelli 500, veronese 300, brexan 200, Asola e la squadra 100, Salò e la squadra 100, Bergamo con le yalle 300, che vien a sumar tutto provisionati 2000 e fo mandato via.

Item, fo mandato in questa sera in campo ducati 20 milia quasi tutti novi di zecha, e tutta via e di festa si bate in zecha.

A di 25 avosto. In collegio, avanti fosse aldito 438* niuno, fo leta;

Da Roma, di l'orator nostro, di 17, 19 fin 20. Come à ricevute lettere di la Signoria nostra con li avisi dil zeneral et di Nepanto di l'arziepiscopo, di 26, et da poi disnar quel zorno andoe dal papa qual aldito le nove turchesche si cavò la bereta di testa, et, *genibus flexis* con le man zonte voltato verso una nostra Dona, pregò Idio donasse vittoria a la Signo-